

Evening Dogri (NSD) Bulletin 03-08-2024

आकाशवाणी

खास खबरां

- 1 प्रधानमंत्री नरेन्द्र मोदी होरें आखेआ ऐ भारत अन्नदाने दा सुद्दा उत्पादन करने आला मुख्य ऐ ते अस कुलसंसारी सतह पर खाद्य सुरक्षा पक्की करने च लग्गे दे आं।
- 2 केन्द्र गृहमंत्री अमित शाह होरें देशवासिएं गी हर घर तिरंगा मुहिम गी मजबूत करने दी कीती अपील।
- 3 एसएसबी दे डरैक्टर जनरल दलजीत सिंह होरें गी डीजीपी बीएसएफ दा दित्ता गेआ बाद्धू औहदा।
- 4 सेना नै हिमाचल प्रदेश दे हाड़ प्रभावत इलाकें च मदद आस्तै किट्ठे कीते संसाधन।
- 5 सरकार नै केरल च जमीन खिसकने करी प्रभावत लोकें दी हर चाल्ली दी मदाद आस्तै सार्वजनिक क्षेत्र दी बीमा कंपनिएं गी दित्ते निर्देश।
- 6 पैरिस ओलंपिक च तीरंदाज दीपिका कुमारी महिला एकल मकाबले दे क्वार्टर फाइनल च हारी गेइयां न।

<><><><><><>

PM-Economist

प्रधानमंत्री नरेन्द्र मोदी होरें अज्ज आखेआ ऐ जे भारत अन्नदाने दा सुद्दा उत्पादन करने आला मुख्य ऐ ते ओ कुल संसारी सतह दे खाद्य सुरक्षा ते विश्व खुराक सुरक्षा सरबन्धी कम्में च लग्गे दा ऐ। उनें आखेआ जे सरकार सुधारें दी मदद कन्ने राई-बाई दे क्षेत्र च मजबूती आहन्ना करदी ऐ ते इंदा उद्देश्य

करसानें दे जीवन च सुधार आहनना ऐ। अज्ज नमीं दिलली च 32में अंतराष्ट्रीय कृषि अर्थ-शास्त्री सम्मेलन गी संबोधत करदे होई मोदी होरें आखेआ जे राई-बाई दा क्षेत्र सरकार दी आर्थिक नीति दा केन्द्र ऐं उनें आखेआ जे भारत मुट्ठे अनाज, दुध, दालें ते मसालें दा दुनिया दा सब्बने शा बड्डा उत्पादक मुख्य ऐ ते राई-बाई दे क्षेत्र च तकनीकें दे इस्तेमाल कन्ने बड़ा मता सकारात्मक बदलाव दिक्खने गी लब्धा करदा ऐ जेहड़ा दिल बधाने आला ऐ। प्रधानमंत्री मोदी होरें देसै च राई-बाई दे क्षेत्र च तजुर्बे, अनुसंधान ते नमिएं तकनीकें काह्डें दे इस्तेमाल दा बी जिक्र कीता। उनें आखेआ जे मुख्यै च एल्लै राई-बाई दी शिक्षा देने आले 500 कोला मते कालेज न ते 700 कोला मते कृषि विज्ञान केन्द्र करसानें गी नमीं प्रौद्योगिकी दे बारे च सूचनां ते जानकारीयां उपलब्ध करा करदे न। उनें आखेआ जे पिछले 10 बरें दरान 9 लक्ख हेक्टर जमीं गी सूक्ष्म सिंचाई दे दायरे हेठ आंदा गेआ ऐ। साढत्रे संवाददाता नै जानकारी दित्ती ऐ जे इस सम्मेलन च कोई 75 बक्ख-बक्ख मुख्यें थमां आए दे 1 जहार कोला मते प्रतिनिधि हिस्सा लै करदे न।

<><><><><><>

Rev Shah-Har Ghar Tiranga

केन्द्री गृहमंत्री अमित शाह होरें देशवासिएं गी अपील कीती ऐ जे “हर घर तिरंगा” अभियान दे तैहत ओह 9 थमां 15 अगस्त तककर अपने घरें च तिरंगा फैहरान। उनें लोकें गी तिरंगे कन्नै अपनी सैल्फी गी हर घर तिरंगा दी वैबसाईट harghartiranga.com उप्पर अपलोड करने लेई बी आखेआ। श्री शाह होरें आखेआ जे प्रधानमंत्री नरेन्द्र मोदी हुंदी “हर घर तिरंगा” मुहिम दऊं बरें च इक राश्ट्री आंदोलन च बदली गई ऐ। उनें एह बी आखेआ जे एह मुहिम भारतीयें च एकता गी जगाह करदी ऐ।

<><><><><><>

Human Rights

राष्ट्री मानवाधिकार आयोग एनएचआरसी नै दिल्ली दे प्रमुख सचिव ते पुलस अधीक्षक गी पिछले 1 महीने दे अंदर दिल्ली सरकार तरफा चलाए जा'रदे रैन बसेरा-आशा किरण च 12 लोकें दी मौत होने दे सिलसिले च नोटिस जारी कीता ऐं आयोग नै 4 हफ्ते दे अंदर तफसीली रिपोर्ट मंगी दी ऐ। आयोग नै दिखेआ ऐ जे मीडिया रिपोर्टें च रैन बसेरें च रौहने आले लोकें दी भीड़भाड़ दा मुद्दा चुक्केआ जा'रदा ऐ जेहड़ा गैमानवधिकारें दा उल्लंघन ऐ। आयोग नै आखेआ ऐ जे घट्ट समें च मती गिनतरी च लोकें दी मौत होना इस मामले च अधिकारिणं दी लापरवाही गी दस्सेआ ऐ। आयोग नै आखेआ जे रेन बसेरें च 5 सौ लोकें दे रौहने दा इंतजाम ऐ, फिलहाल उंदे च 1 जहार शा मते लोक रवा'रदे न।

<><><><><><>

Jatinder Singh

प्रधानमंत्री हुंदे दफ्तरै च राज्यमंत्री डॉ. जितेन्द्र सिंह होरें अज्ज आखेआ ऐ जे जम्मू कश्मीर च नशीले पद्धार्थे दी तस्करी दुधारू पशुएं दी तस्करी करने आले ते गैर कनूनी तौरा पर नालें ते दरेयाएं चा लेतर बजरी कड्डने आलें खलाफ सख्त कारवाई कीती जाग। ओह अज्ज कठुआ जिले दे जनता दरबार दरान लोकें दिऐं दिक्कतें गी सुना'रदे हे।

<><><><><><>

BSF-DG

एसएसबी दे डरैक्टर जनरल दलजीत सिंह चौधरी होर, नितिन अग्रवाल होरें गी समें कोला पैहले औहदे उप्परा हटाए जाने मगरा सीमा सुरक्षा बल दा अतिरिक्त प्रभार संभालगंन। केरल कैडर दे 1989 बैच दे भारती पुलस सेवा दे अफसर अग्रवाल होरें गी शुक्रवारें बीएसएफ दे डीजी दे औहदे उप्परा हटाई दित्ता गेआ हा। शनिवारें गृहमंत्रालय आस्सेआ जारी कीते गेदे इक आर्डर च आखेआ गेआ ऐ

जे उत्तर प्रदेश दे कैडर दे 1990 बैच दे आईपीएस अफसर दलजीत सिंह चौधरी होरें बीएसएफ दे डीजी दे औहदे दा अतिरिक्त प्रभार संभालगंन। सरकार आस्सेआ बीएसएफ दे दऊं शीर्ष अफसरें गी हटाने दा एह फैसला भारत पाकिस्तान अंतराष्ट्रीय बन्ने कन्नै लगदे जम्मू क्षेत्र च लगातार आतंकी हमले गी दिखदे होई लैता गेआ ऐ, जेहदे च सेना ते सुरक्षा कर्मिएं सनें केई नागरिकें दी बी मौत होई गई ही।

<><><><><><>

Himachal Pradesh

भारती सेना ने हिमाचल प्रदेश दे हाड़ प्रभावत क्षेत्र शिमला ते मंडी जिलें च राहत कम्में च मदद आस्तै संसाधन किट्टे कीते न। शिमला दे समेज ग्रां च सेना दी त्रै टुकड़ियां, इक इंजीनियर टास्क फोर्स ते इक मैडिकल टीम तैनात कीती गई ऐ। टीम नै शिड़कें दी मरम्मत कीती ते फुटब्रिज बनाया ते लोड़मंद बसनीकें गी इलाज दी सहूलियत दित्ती। मंडी दे बरोट ग्रां च बद्दल फट्टने करी 10 लोकें दे लापता दे परैंत राज्य आपदा मोचन बल नै तपाशी अभियान चलाया ऐ। मुख्यमंत्री सुखविंदर सिंह सुक्खू होरें घटना आली थाहर दा दौरा कीता।

<><><><><><>

Organ Donation

अज्ज 14मां भारतीय अंगदान दिवस मनाया जा'रदा ऐ। इस मौके पर सेहत ते परोआर कल्याण मंत्रालय दे तैहत राष्ट्रीय अंगदान ते टिशू प्रत्यारोपण संगठन आस्सेआ अज्ज नमीं दिल्ली च अंगदान जागरूकता कार्यक्रम दा सरिस्ता कीता गेआ। इस मौके पर सेहत ते परोआर कल्याण राज्य मंत्री अनुप्रिया पटेल होरें उनें परोआरें गी सम्मानत कीता जिनें ब्रेन डेड घोशत होने दे बाद अपने परोआर दे जीएं दे अंगें दा दान कीता। मंत्री होरें आखेआ जे पिछले 10एं ब'रें च मुल्खै अंदर अंगदान करने दे मामले कोई 4 गुणा बधियै 18 जहार 378 तगर पुज्जी गे

न। अनुप्रिया पटेल होरें इस उपलब्धि लेई डाक्टरें ते परोआर जनें दी बी सराहना कीती जेह्दे अपने धरै दे जीएं दे अंगदान लेई अगगे आए ते उनें सब्बनें लोकें दा बी आभार प्रगट कीता जेह्दे समाज च इस बारे जागरूकता पैदा करियै लोकें गी इस नेक कम्मै लेई प्रेरत करा करदे न।

<><><><><><>

Assam Semiconductor

टाटा इलैक्ट्रानिक्स नै अज्ज असम दे मोरीगांव जिले दे जागीर रोड क्षेत्र च अपनी चीप निर्माण ते परीक्षण इकाई दा भूमि पूजन कीता। इस मौके पर राज्य दे मुख्यमंत्री हेमन्ता बिस्वा सरमा ते टाटा सन्स दे प्रमुख एम.चन्द्रशेखरन मजुद हे। मुख्यमंत्री होरें आखेआ जे असम इस सैमी कंडक्टर सयंत्र दे बनने कन्ने दुनिया भर दे बिजली कलपुर्जे दे निर्माण च नां करोग। उनें आखेआ जे अज्जै दा ध्याड़ा राज्य दे औद्योगिक ते तकनीकी विकास आस्तै महत्वपूर्ण ध्याड़ा ऐ। एहदे कन्नै सैमी कंडक्टर क्षेत्र च भारत आस्तै सुनेहरें युग दे औने दी मेद ऐ। टाटा सन्स दे प्रमुख एन.चन्द्रशेखरन होरें आखेआ जे एहदे जरियै बिजली कन्नै चलने आली गडिडएं, मोबाइल फोन ते केइं किस्में दे इलाज च इस्तेमाल औने आले उपकरणें आस्तै हर रोज 4 करोड़ 80 लख चीपें दा निर्माण कीता जाग।

<><><><><><>

Official Saked

राष्ट्र विरोधी तत्वे दे प्रति अपनी जीरो टॉलरेंस नीति कन्नै चलदे होई जम्मू कश्मीर केन्द्र शासत प्रदेश दी सरकार नै अज्ज राष्ट्र बरोधी गतिविधिएं च शामिल 5 पुलस दे सिपाही ते इक अध्यापक सनें 6 कर्मचारिएं गी बर्खास्त करी दित्ता। अधिकारिएं मताबक बर्खास्त कीते गेदे कर्मचारी कनून प्रवर्तन ते खुफिया अजेंसिएं दे नोटिस च आए ते उनेंगी आतंकवाद सरबन्धी गतिविधिएं च शामिल पाया गेआ, जेह्दे राज्य दे हितें गी नुक्सान पंजादी ऐ। जिनेंगी बर्खास्त कीता गेआ ऐ उंदी

पंछान सैफ दीन, सैलेक्शन ग्रेड कांस्टेबल दे तौरा पर होई ऐ ते जेहड़ा डोडा दे शिगानी भलेसा दा रौहने आला ऐ। जेहड़ा नारको टैरर फंडिंग दा आरोपी ऐ। फारूक अहमद शेख, हैड कांस्टेबल ते रहमत शाह, कांस्टेबल एह त्रऊं जनें करनाह दे रौहने आले न ते एह त्रैनें एलओसी च नशा, थेआर ते पैहे दी तस्करी च शामिल हे। इरशाद अहमद चालकू, सैलेक्शन ग्रेड कांस्टेबल एह सिलिकोट उड़ी दा रौहने आला ऐ ते ओवर ग्राउंड वर्कर दे तौरा उप्पर कम्म करदा हा ते नजाम दीन जेहड़ा की इक सरकारी मास्टर हा, पुंछ जिले दे किरनी हवेली दा रौहने आला ऐ जेहड़ा हिज्बुल मुजाहिद्दीन आतंकी संगठन दे ओवर ग्राउंड वर्कर दे तौरा पर कम्म करदा हा, गी बी सेवाएं थमां हटाई दित्ता गेआ ऐ।

<><><><><><>

Amrica Forest Fire

अमरीका च अगग स्हालने आले कर्मचारी देस दे पच्छमी हिस्से दे जंगलें च लग्गी दी अगग उप्पर काबू पाने लेई युद्धस्तर उप्पर कोशश करा'रदे न। अगगे नै चार काउंटियों बट्टे, प्लुमास, शास्ता ते हेहामा गी प्रभावत कीता ऐ। तकरीबन 4 ज्हार लोकें गी सुरक्षत कड्डेआ गेआ ऐ ते अजें तगर कुसै दी मौत दी कोई खबर नेई ऐ।

<><><><><><>

Govt. Insurance Company

सरकार नै सार्वजनिक क्षेत्र दी बीमा कंपनिएं गी केरल च जमीन खिसकी जाने करी प्रभावत होए दे लोकें दी हर संभव मदद करने दे निर्देश दित्ते न, जेहूदे च बीमा दावें दा तेजी कन्नै निपटारा पक्का होग ते पूरा भुगतान कीता जाई सकै। वित्त मंत्रालय नै दस्सेआ जे भारती जीवन बीमा निगम गी प्रधानमंत्री जीवन ज्योति बीमा योजना दे हेठ नामित बीमा धारकें गी तौले भुगतान करने आस्तै आखेआ ऐ। मंत्रालय नै आखेआ जे इस सरबंघ च तेजी कन्नै कम्म करने आस्तै जरूरी

दस्तावेजी प्रक्रिया च राहत बी दित्ती गई ऐ। बीमा कंपनिएं इस मामले च कोशशां शुरू करी दित्तियां न ते ओ जमीन खिसकने कारण सब्बने शा मते प्रभावत जिले—वायनाड, पजक्कड़, कोसीकोड ते त्रिशुर च बक्ख—बक्ख जरिएं कन्नै अपने बीमा धारकें दी जानकारी हासल करा'रदियां न। सार्वजनिक बीमा परिषद, बीमा कंपनिएं दी मदद कन्नै एह पक्का करोग जे दावें दे नबेड़े तौले कोला तौले कीते जान ते तोले गै भुगतान कीता जा। इस सरबंधे च इक पोर्टल शुरू कीता जाग जेहड़ा हर रोज होए दे कम्में दी जानकारी उपलब्ध करोआगं मंत्रालय ने आखेआ ऐ जे केन्द्र सरकार इस आपदा कन्नै प्रभावत होने आले लोकें दी मदद आस्तै वचनबद्ध ऐ ते सरकार एह पक्का करोग जे इनें लोकें गी बगैर कुसै चिरे दे ते परेशानी दे सारी जरूरी सुविधां दित्तियां जान।

<><><><><><>

Eve of Olympics Feats

पैरिस ओलंपिक च तीरंदाज दीपिका कुमारी नै महिला सेलैक्शन सिंगल्स एकल दे क्वार्टर फाइनल च हारी गेइयां न। दीपिका होरें एलीमीनेशन राउंड च शानदार प्रदर्शन करदे होई नीदरलैंड दी तीरंदाज Quinty Roeffen उप्पर 6—4 कन्नै जित्त हासल करी लेई। दूई बक्खी 25 मीटर एयर पिस्टल शूटिंग च मनु भाकर होरें अपने त्रीए तगमे जित्तने कोला खुंझी गेइयां ते उनेंगी इतेहासक दऊं कैह दे तगमें कन्नै गै संदोख करना पेआ। मुक्केबाजी च भारती खडारी निशांत देव होंदा मकाबला मर्दे दे 71 किलोग्राम वर्ग दे क्वार्टर फाइनल च मेक्सिको दे खडारी वरदे एवरेज दे कन्ने अज्ज रातीं होग। इस मकाबले च निशांत हुंदी जित्त कन्नै भारत दे इस ओलंपिक च जित्ते दे तगमे च इक होर इजाफा होई सकदा ऐ। गोल्फ च शुभांकर शर्मा ते गगनजीत भुल्लर होर त्रीए राउंड लेई कोशश करगंन।

<><><><><><>

America Embassy Bangladesh

ढाका च अमरीकी दूतावास ते बंग्लादेश च रौहने आले अपने बसनीकें आस्तै सुरक्षा चेतावनी जारी कीती ऐ। अधिकारिक वेबसाइट च दित्ती गेदी जानकारी मताबक ढाका च होआ'रदे विरोध प्रदर्शन ते सरकार दी कारवाई गी दिखदे होई एह फैसला लैता गेआ ऐ। अमरीकी नागरिकें गी आखेआ गेआ ऐ जे ओ विरोध प्रदर्शन ते हिंसा कोला बचने आस्तै भीड़भाड़ थमां दूर रौहने ते जेकर अमरीकी नागरिक असुरक्षित मसूस करदे न ते ओह वापस अपने देश आई सकदे न। एहूदे इलावा उन्हें बंग्लादेश दी यात्रा पर नेई जाने आस्तै बी आखेआ ऐ।

<><><><><><>

Shekawat

केन्द्री पर्यटन ते संस्कृति मंत्री गजेन्द्र सिंह शेखावत होरें आखेआ ऐ जे सैलसफे च भारती अर्थ-बवस्था गी दुनिया दी त्रीह सब्बने शा बड्डी अर्थ-बवस्था बनाने दी क्षमता ऐ। ग्रेटर नोयडा च 7मीं अंतर्राष्ट्रीय मेहमानबाजी प्रदर्शनी दे उद्घाटन समारोह गी संबोधत करदे होई शेखावत होरें आखेआ जे सरकार सैलसफा ते मेहमानबाजी क्षेत्र च बेह्तरीन हासल करने आस्तै प्रतिबद्ध ऐ ते भारत च सैलसफे दे मते सारे मौके न। शेखावत होरें आखेआ जे देश च राई-बाई ते सैलसफा दी प्रमुख क्षेत्र ऐ न जेह्दे लोकें दी इच्छा दे मताबक हर चीज गी पूरा करदे न। उन्हें आखेआ जे सैलसफा क्षेत्र 2047 तोड़ी भारत गी इक विकसित राष्ट्र बनाने च महत्वपूर्ण योगदान देई सकदा ऐ।

<><><><><><>

IMD

मौसम विभाग नै अज्ज मध्यप्रदेश, मध्य महाराष्ट्र, गुजरात, कोंकण ते गोवा च मौलेधार बरखा दा रैंड अलर्ट जारी कीता ऐ। अगले 4 दिनें दे दरान राजस्थान, उत्तराखंड, पच्छिम राजस्थान, पच्छिम बंगाल दे उपहिमालयी क्षेत्र, बिहार ते उत्तर

पूर्व क्षेत्रें च तेज बरखा दा ओरेंज अलर्ट जारी कीता गेआ ऐ। पच्छम बंगाल ते झारखंड पर हवा दे धट्ट दवाब दा क्षेत्र ते चक्रवाती संचरण बने दा ऐ। अगले 48 घैंटे दे दरान झारखंड, दक्खन पूर्वी उत्तर प्रदेश, पूर्वी मध्य प्रदेश ते उत्तरी छत्तीसगढ़ च पच्छम-उत्तर-पच्छम दी बक्खी बधने दी मेद ऐ।

<><><><><><>

Uttrakand

उत्तराखंड च केदारनाथ यात्रा रस्ते दी बक्ख-बक्ख थाहरें च फसे दे तीर्थयात्रिएं गी सुरक्षत कड्डने आस्तै राहत ते बचाह अभियान अज्ज त्रिए रोज जारी ऐ। अजें तोड़ी तकरीबन 7 ज्हार श्रद्धालुएं ते मकामी बसनीकें गी सुरक्षत कड्डेआ जाई चुके दा ऐ। जिला, राज्य ते राश्ट्री आपदा मोचन बल दी टीमां ते पुलस विभाग हैलीकाप्टर दी मदद कन्नै बड़ी तेजी कन्नै बचाह कम्में च लग्गे दा ऐ। अजें बी कोई 1 ज्हार श्रद्धालु जगह-जगह फसे दे दन।

<><><><><><>

Somalia

सोमालिया दी राजधानी मोगादिशू दे लिडो बीच उप्पर शुक्रवारें होए दे आतंकी हमले च अजें तगर 32 लोकें दी मौत होइ गई ऐ ते 63 लोकें दे जख्मी होने दी खबर ऐ। सुरक्षाबलें मौके उप्पर गै 5 आतंकवादिएं गी गोली मारियै मौत दे घाट उतारी दित्ता हा। उत्थें गै 6में आतंकवादी नै अपने आपे गी बम्ब कन्नै उओआई दित्ता हा।

<><><><><><>